

spänn. von wegen Irer gelassen hab vnd güter. vnd was in dem ellem barürt, zugetragen haben. Nemblich, daz gedachter herr Camerprocurator der gemelten Reberlin gelassen hab vnd güter, als fur erblos, confiscierte, vnd haimgefallne güter angesprochen, Vnd aber die von Veldkirch sich berüemt, wie Sy ain alts herkomen bey Irer Statt hetten, des Sy auch in gebrauch vnd vbung bisher gewesen, daz bei Inen in der Statt Veldkirch, der ledigen vnd vnelichen gebornen, gleich der eelich gebornen güter geerbt worden wärn Welches Ires gebrauch vnd herkomens, Inen der herr Camerprocurator, an stat der kunigklichen Mayestat, als Lanndsfürsten, nit gestanden, sünders daselb zum höchsten widerfochten hat, mit dem anzaigen, daz dergleichen Erbschafften der vnelich gebornen personen güter, nyemand anderm, dann nür allein der kunigklichen Mayestat, als rechtem natürlichen herrn vnd Lanndsfürsten, der herrschafft, vnd Statt Veldkirch Zügehörig seyen, Derowegen die partheyen hieher für der Römischen kunigklichen Mayestat. Vicestatthalter. Regennten vnd Camer Rat zu gütllicher vnd rechtlicher handlung erüordert vnd erschinen sind. Dieselben von der Regierung vnd Camer haben Sy gegeneinander, aüsserhalb rechtens, verhört, vnd dieweil deren von veldkirch Gesandten, auf des Herrn Camerprocurators widersprechen, Ires berumbten gebrauch, nicht grundtlich, noch beweislich, weder mit schriftten, noch in annder weg, zü solcher taglaistung, für. oder dargebracht, daz Sy dermassen, wie Sy sich berumbt, gefreyt wärn. Haben Sy sich zugehorsam der kunigklichen Mayestat, als Ires rechten natürlichen angebornen herrn vnd Lanndsfürsten in namen gemainer Statt Veldkirch, solches Ires berumens, vnd vermainten gebrauch vnd rechtens, daz bey Inen der vnelich geborn, gleich der eelich gebornen güter geerbt werden solten frey willigklich geneczlich begeben vnd entslagen. Also, daz Sy die Römisch kunigklich Mayestat, Iren herrn vnd Lanndsfürsten, an solchem Ort hinfüran nit mehr verhindern. noch ainich eintrag thun. sunder daz sein Mayestat. oder derselben Camerprocurator, Iren vnuerhindert, aller vnelicher personen gelassne güter, wo die nit eelich geborn Leibs Erben hinder Inen verlassen, erben, vnd einzichen lassen sollen, on gefärde, Diser gutlichen enttschlahung ist vilgemeltem herrn Camerprocurator, auf sein begern.